




Literatura den Bon Dia

Ernesto E. Rosenstand



COMPANASHI

Cronica di recuerdonan scondi

Den dia nan tabata scucha radionan di aliado, anochi e Alemannan. E noticianan hopi biaha tabata contradictorio. Nan tabata forma parti di e guerra sicologico cu tur dos banda tabata hiba.

Esei mes tabata haci cu tur dos tabata participa na mundo nan adelanto den e lucha fuerte cu nan tabata hibando Y dor di tende tur dos banda bo por a deduci miho kico tabata pasando aya banda.

Alemannan tabata transmiti nan programa pa Latino America. Esei pasobra aki banda tabatin hopi Aleman tabata biba. Y nan tambe kier a participa nan paisano aki banda kico tabata pasando aya banda.

Asina nan tabata keda bon informa di loke tabata pasando na Europa. Y tabata duna nan material pa discuti e desaroyo di e guerra. Ki ora nan haya chens nan tabata haci esei.

Cada un tabata bisa loke tabata cumbini nan. Y e hombernan cu tabata scucha nan tabata saca naturalmente e conclusion cu tabata cumbini nan. Loke tabata percursa pa discusionnan fuerte.

Nan no tabata noticianan obhetivo. Nan tabata parti di e guerra. E parti sicologico. Y pa keda miho informa tabata haya informacion di tur dos banda. Un mas exagera cu e otro.

Anto pa despues sinta comenta loke nan a tende di e dos bandanan. Hende grandi tabata sigui e guerra aki cu hopi atencion. Tabata un sorto di hobby anochi laat sinta scondi scondi scucha e noticianan cu tabata bin di e continente bieu. Pa su otro dia bai comenta nan.

Esei no tabata pasa solamente aki na Aruba. Ya na Colombia mi tabata tende mi padushi comenta riba esaki. Aya tambe nan tabata coi noticianan cu tabata bin di Alemania. Esei naturalmente cerca e hendenan grandi.

Muchanan tabatin otro interes. Hendenan bieu tabatin gran admiracion pa tur loke tabata Aleman. Loke tabata algo insolito. No por a compronde con por tabata posibel cu tabatin asina hopi simpatia pa e causa Aleman. Di con? Esei ta un pregunta cu mi no por a contesta. Esaki no tabata solamente aki ma aya tambe.

Mayoria di noticia cu tabata bin di e continente bieu tabata horibel. Tur dos banda tabata publica di e avancen cu nan tabata haci y di e cantidad di hende cu nan tabata mata. Pues cada un na nan manera.

Tin biaha un tiki exagera, esaki pa busca manera pa influencia e opinion publico. Segun e noticianan aki e guerra lo no dura hopi ya cu ambos banda tabata bisa cu nan tabata progresando grandemente.

Pues noticianan na granel. Un mas horibel cu otro. Algun di nan te hasta increibel! Y mi ta kere cu esei mes tabata haci cu hopi tabata anochi laat claba na nan radio ta scucha loke tabata pasando na e continente Europeo. Noticianan

negativo semper ta paga, no e temponan ei, ma semper.awendia mes esei no a cambia.

Aya banda nan tabata mata otro ni cacho! Afortunadamente e batayanan aki tabata tuma lug a hopi leu for di nos fronteranan.

Na luganan unda ni e nombernan bo tabata conoce. Ni pronuncia bo por a pronuncia nan, corda pa sa unda nan tabata keda. Ma sin embargo nan tabata haci impacto riba nos aki banda. Mas tanto riba e hende grandi.

Y esei tabata haci cu e hendenan aki tabata usa e noticianan aki pa discuti te bai gol. Oranan largo nan por a haci esei. Si bo tende nan discuti bo tabata kere cu nan si por a soluciona e conflicto. Un conflicto cu tabata keda leu for di nos costanan. Ma segun nan nan tabata tin e solucion.

Guera tabata e tema di combersacion e temponan ei. Nos como mucha no tabata interesa loke tabata pasando na luganan asina leu cu practicamente ningun di nos a yega di tende di nan.

Nos interesnan tabata otro caminda. Mas cerca di cas. Ma mester bisa cu e conflicto aki tabata uno hopi serio. El a trece cambio pa masha hopi hende.

E conflicto arma aki no a trece problemanan serio so pa e paisnan cu tabata den guerra o cu tabata keda banda di nan, ma tambe aki banda el a percursa pa influencianan negativo den bida di e pueblonan aki.

A trece cambionan grandi den e bida di tur dia. No directamente, ma indirectamente. Hopi negativo mes! No di e grave ei, ma tog importante pa e region. Mi kier men entre otro Colombia, unda nos tabata biba.

Aya tambe a cuminsa sinti e influencia negativo cu un guerra ta trece. Esaki principalmente riba tereno economico. Esaki mes a haci cu nos mester a bin biba aki na Aruba. Nos mester a bandona Colombia.

Bida tabata bira aya dia pa dia mas duro. Anto sin speransa di bin cambio a corto plaso. Noticianan for di Europa tabata confirma esaki.. P'esei mes a dicidi di bin Aruba. Maske nos no tabata kier, ma no tabatin awa pa laba.

Mama no kier a keda pasa trabou aya bou. Y p'esei a dicidi di bin aki. No tabata un decision facil, ma si uno prudente pa nos tur. Esei nos a experencia hopi despues.

Tabatin pobresa. Anto sin speransa pa haya tamponan miho. Al contrario. Dia pa dia cosnan tabata bira pio. Aya cosnan tabata bai di malo pa pio.

Mi mester bisa cu mi a nace na Colombia, pa ta mas exacto na e stad Santa Marta. Un bunita stad parti nort di e pais, cu un bahia sin igual. E ta e capital di e Departamento di Magdalena. Y puerto for di unda e bacobanan tabata ser exporta.